

## Jaorverslaag vastelaovesvereniging De Wien 2023-2024

### *Algemeine Lejevergadering*

Dit seizoen ware d'r twee Algemeine Lejevergaderinge. De ierste vónd plaats op 7 juni 2023. Tiejes deze vergadering zien Lindy van Es, Rob van Tankeren en Nathalie Frederiks aangedrage en gekaoze as nieje bestuursleje. Marcel Betzel (11 jaor actief lid), Renee Lammen (22 jaor actief lid) en John Storm (11 jaor actief lid) zien gehuldig. Tiejes de vergadering woort ouk nog stil gestaon beej vertrekkende kemissieleje te weite: Marcel Elbers, Loek Tubing, Chris Munten, Ralph Roodbeen en Maurice Peters (Raod van Elf), Huub Beeren, Leo Hauser, Chris Munten en John Storm (Joekskemissie), Monique Rijk (Jeugkemissie), Nik Geurts (Sponsorkemissie) en Leon Helgers (P&P). En as letste zien d'r nog nieje kemissieleje beej gekómme: Linda Driessen en Robert Frederiks (Joekskemissie), Nicol Lammen (Jeugkemissie), Jos Zanders (P&P) en Paul Klein (TC).

Op 11 oktoeëber 2023 vónd de extra ingelaste Algemeine Lejevergadering plaats. Deze vergadering stónd in 't teiken van 't bespraeke en prissenteren van 't financieel jaorverslaag, de begruueting veur 't seizoen 2023/2024 en 't verslaag en verkeezing van de kaskemissie.

### *Wiener Leedjes Festival*

Op vriedaag 20 oktoeëber woort ós jaorlikse leedjesmatinee geprissenteed in ein gans niej jeske ónder de nieje naam Wiener Leedjes Festival. 't Waas eine gezellige en good gevólde aovend met waal 13 leedjes die gezónge woorte in ein oetverkoch Domani. Bas Holthuisen wis met zien nummer "Morge, dan meug ik meug zien" de ierste plek te bemachtige. De wäörd zien van Linda Driessen en de meziek van Marcel Driessen. De tweeëde plek ging nao 't leedje "'t Is wie 't is" gezónge door Marc Houwen, Leon Theuws, Sandra Schattenkerk en Marion Nissen. De wäörd en meziek zien aafkómstig van Marc Houwen. As letste waas de derde plaats veur 't leedje "Det geit 'm waere" gezónge door Bér Kerren en Max van den Brand. De wäörd zien van Linda Driessen en de meziek van Marcel Driessen.

### *Inschete*

Zoeë wie idder jaor mochte ouk dit jaor, op 11 november, alle trio's van de Venlose Vastelaovesvereniginge de vastelaovend inscheete op de Mert. Ouk 't inschete is in ein niej jeske gestäöke; zoeë meuste d'r dit jaor namelijk veuraaf kaertjes besteld waere, umdet de Mert aafgeslaote woort.

### *Aaftraeje met Joeks*

Vriedaag 24 november stónd in 't teiken van 't aaftraeje van 't trio 2022/2023: Hoeëgheid Renee (I) Lammen en zien adjudante Dirk van Dijk en Marcel Betzel. Tegelijkertied waas dit d'n aovend waarop de winnende leedjes van 't Wiener Leedjes Festival geprissenteed woorte. Eine aovend met eine lach en ein traon in ein vol Kefee de Witte.

### *Kerskiene*

't Kerskiene vónd dit jaor op zóndaag 17 december plaats beej Grand Café Maagdenberg. De zaal waas lekker vol en 't waas eine gezellige en spannende middaag met leuke prieze.

### *Prinsegala*

Zaoterdaag 6 jannewari waas 't dan zoeë wied. 't Nieje trio woort in 't geheim veurgesteld aan 't bestuur, iereleje en Raod van Elf. 's Aoves waas d'r ein gewéldig Prinsegala georganiseerd in Domani. 't Waas good drök en de spanning leep hoeëg op. Gelökkig kós Vors Wienius ós snel met aanwizinge op 't juuste spoor bringe. Dao op 't podium stónde zeej dan: Prins Sander I Aerts met zien adjudante Arjan Heetman en Ruud Alberts. 't Nieje trio woort veurzeen van eur regalia en de maedjes woorte in de bleumkes gezatte. 't Waas eine aovend, met vuul gezelligheid, meziek en ein traon, wao De Wien haet laote zeen wie good zeej kin handele (dank allemaol!).

### *Vlagheise en Groeët Venlose Gulpener Hierezitting*

Fris en fruitig stónd idderein weer klaor op 7 jannewari veur 't vlagheise, de medaljeraegen en neteurlik ós Groeët Venlose Gulpener Hierezitting. Vanwaege 't sloete van Grand Café Maagdenberg zien weej dit jaor oetgeweke nao Domani. De Wienvlag woort gehese en daomei kós ós vastelaovessezoen officieel starte! Zoeë wie det geit met 't vlagheise woort de proklamatie veurgelaeze en woorte de nije Wienleedjes gezóng. En dao beej neteurlik ein lekker glaeske champagne. Nao 't vlagheise kreges alle bestuurs- en kemsissieleje en de ald prinse eur medalje oetgereik in Domani tiejes de medaljeraegen. Veur de aanwezige hiere waas 't tied um zich dao nao de zaal te begaewe um ein groeët fees te gaon bouwe tiejes de Groeët Venlose Gulpener Hierezitting met ónder andere Dansgroep Los del Sol, Oet de Maot en Julia Beurskens.

### *Joeks Tam-Tam*

Op vriedaag 12 jannewari waas 't dan zoeë wied veur ós Jeugtrio 2024. In Brasserie De Witte mochte Prinses Tess I (Lammen) same met eur adjudante Saartje (Hesselmans) en Guusje (Verleun) eur septer gaon zweie euver 't Jeug-Wienriek. 't Waas eine waanzinnige aovend in ein bómvolle zaal, wao flink gedans is wies in de late eurkes.

### *Familie vastelaoveskiene*

Daags d'r op waas 't veur 't jeuggezelschap weer tiéd um klaor te staon veur 't Familie vastelaoveskiene in Brasserie de Witte. 't Jeuggezelschap stónd d'r weer fris en fruitig op. 't Waas ein fantastische middaag met vuul winnaars en práchtige priéze!

### *Jeugreceptie*

Net bekómme van 't weekend d'r veur en as ein van de ierste jeugtrio's waas 't vriedaag 19 jannewari zoeë wied veur Tess I, Saartje en Guusje; eur eige jeugreceptie! Alle zuster-vereiniginge, familie, vrinde, bestuur, kemsissies en de Raod van Elf met 't groeëte trio ware massaal nao Brasserie De Witte gekómme um dao Prinses Tess I en eur adjudante Saartje en Guusje te fillisitere met eur oetverkeezing dit jaor. 't Waas ein leuke en gezellige receptie wao tóssedoor tied waas veur zang en dans.

Zóndaag 14 jannewari woort de receptie bezóch van 't Boerebroelofsgezelschap; dit jaor georganiseerd door de Kwante Kaketoe.

### *Heilige Mis en groeëte receptie*

Veur de groeëte receptie, dae dit jaor op 21 jannewari plaats vónd, vindt altied de Heilige Mis plaats in de Familiekerk ónder leiding van Daeke Spee. 't Waas ein moeëje vastelaovesmis met ónder andere zang van Gé Deenen, Linda en Marcel Driessen en de Ald Prinse. Aansloetend aan de mis is 't ganse gezelschap vertrokke nao Domani wao ein lunch klaor stónd. Um twee oor begós de groeëte receptie wao alle zustervereiniginge, vrinde, bekinde en clubs eur fillisitaties euver brachte aan Hoeëgheid Sander I met zien adjudante Arjan en Ruud.

Zóndaag 28 jannewari waas d'n daag det de recepties van Jocus, de Vogelhut en de Gaaskaetel zien bezóch.

### *Prónkzitting*

Vriedaag 2 fibberwari luidde dit jaor ein drök weekend in. Met as ierste hoeëgtepunt neteurlik de Prónkzitting. Ouk dit jaor waas d'r weer vuuel meziek, dans, joeks en jen aanwezig. D'r ware onder mier optraejes van ós eige Wienleedjes, Kölsch Platt, Frans Vroomen, Dansgroep Let's Do It en de Shakin DJ's. Inmiddels meuge weej 't waal ein traditie neume: 't bezeuk van 't Jocus-dreejspan. Dit jaor kwame Prins Bram I Holla en zien adjudante Marc Buskes en Pascal Horvers ein bezeuk bringe aan ós trio. Ouk ózze sirremoniemeister woort

nog kort in 't zunke gezatte door Prins Bram I. De afterparty woort muzikaal ingevöld door Linke Mik en is wies in de late eurkes door gegaon.

Weer fris en fruitig meuste de Raod van Elf en 't trio daags nao de Prónkzitting op zaoterdaag 3 fibberwari klaor staon veur de 3-Kes optóch en 't oetrope van de groeët Venlose Nar. Aansloetend woort de prinsefoto van Groeët Venlo gemak en hebbe weej de zitting van 't Roeëje Krutz bezóch. Dao nao stónde de recepties van de Kwas en de Törvers nog op 't programma.

Ein drök weekend, want zóndaag 4 fibberwari stónd de Blierickse daag op de planning. Nao eine optóch vanoet Grand Café Maagdenberg nao Hoeëgheid Sander en ein äöpeningswäördje van Vors Wienius stónd d'r ein heerlijk óntbijt klaor veur 't ganse gezelschap. Nao 't ontbijt begós de Blierickse daag met de recepties van de Wortelepín, de Vaegers en de Moeraskwaakers.

Traditiegetrouw vónd ouk dit jaor op de maondaag nao de Blierickse daag veur 't trio en de Raod van Elf 't Fortissimo-cóncert plaats in de Maaspoort.

#### *'t Wings-bal*

De dónderdaag veur de vastelaovend is d'n aovend van 't Wings-bal. Ouk dit jaor hebbe Raod van Elf en 't trio de receptie bezóch van de Wings, wao Prins Roland I dit jaor zien scepter moch zweie.

#### *Schoeëiendaag met aansloetend Muts van de Bluts*

Idder jaor kieke vuuel schoeële weer oet nao deze daag. Op vriedaag 9 fibberwari waas 't dan zoëë wied. D'n daag det ós trio same met inkele raodsleje ein bezoek brach aan diverse schoeële in Venlo. Heej nao woort d'r nog ein bezoek gebrach aan de Vastelaoves Top 555 op de Parade.

Dit jaor waas 't ierste jaor det de receptie van de Kwas neet veuraaf aan Muts van de Bluts plaats vónd. Um 19.00 oor verzamelde idderein zich in de kelder van In Den Dorstigen Haen um de mutse van de Raod van Elf en 't trio aaf te zette.

Uiteraard meuste ouk 't jeugtrio Prinses Tess I en eur adjudante Saartje en Guusje eur mutse aaf gaon zette. Dit vónd plaats op zóndaag 11 fibberwari in Brasserie de Witte. Verschillende Wienleje, familie, vrinde en bekinde verzamelde zich um same met Jocus Toekóms ós jeugtrio eur mutse aaf te zette, wao zeker ein träönke gelaote is.

Waat hebbe weej weer ein geweldig vastelaovessezoen gehad met idderein dae De Wien ein werm hert toedruueg! Weej kinne as Wien gruuets zien op wie De Wien zich dit jaor haet laote zeen in Venlo en dao boete.

Wienböl en Wienbölkes, hertelik dank veur weer ein fantastisch jaor!

2<sup>e</sup> Sikkertaris,  
Lindy van Es

Veurzitter,  
Ed Faessen